

Fundacion Parke Nacional Aruba y partnernan cu proyecto pa reintroduci e Lora na Aruba



ORANJESTAD (AAN): Durante un presentacion na partners y stakeholders di naturalesa, den presencia di Su Alteza Real Prinses Beatrix, Fundacion Parke Nacional Aruba (FPNA) a anuncia su plan pa reintroduci e parha extinto "yellow-shouldered" amazon, localmente conoci pa e Lora na Aruba como parti di FPNA su "Species Conservation & Reintroduction Program".

Trintitres (33) Lora, cu a wordo trafica ilegalmente via lama for di paisnan bisña, a ser poni bou cuido di FPNA, mediante un decreto ministerial como e organizacion legalmente apunta pa conserva e Lora. E esfuerso aki tin como meta pa reintroduci e Lora den e areanan protegi di naturalesa di nos isla, formando un base pa e restauracion di especienan cu a bay extinto y nan funcion ecologico na Aruba.

E Lora (*Amazona barbadensis*) ta localmente un especie extermina na Aruba for di año 1947, pero cu un lugá significativo den e herencia ecologico y cultural di nos isla. E lora, como especie dominante den e famia di parkiet, tin un funcion ecologico importante, particularmente den distribucion di simia den nos naturalesa, contribuyendo na engrandecimiento di nos flora y fauna

cu na nan turno, ta sostene un esencia mas amplio di e bida salvahe.

E mision di e proyecto di "Reintroduccion y Conservacion di e Lora", ta pa establece un poblacion cu por sostene nan mes na un nivel nacional. Poblacion di e Lora ta existi na arenan isola na Boneiro y Korsou, como tambe na algun partinan nort di Venezuela y islanan di Margarita y La Blanquilla. E Lora a wordo evalua pa ta riba e "IUCN Red List of Threatened Species" na año 2021. Pa Aruba especificamente, e Lora ta protegi pa ley bou Ordenansa di Naturalesa, Articulo 4, y AB 2017 no. 48.

Menasa Local pa e Lora

E tipo di parha, c y parkiet, ta un di e gruponan di parha mas menasa na mundo. Tin hopi menasa pa e poblacionnan di Lora y mayoria di e menasanan aki ta di origen humano (Birdlife International 2017, Silvius 1991). Estudionan científico ta conclui cu e Lora a ser ultimo mira na Aruba rond di 1947. Ta conoci cu e extincion di e Lora ta debi na jaagmento ilegal pa bendemento como mascota, y matamento di e lora pa motibo cu e ta wordo considera un plaga pa agricultura (Voous 1983). Otro menasa local serio ta e es-



pecienan invasivo manera, pushi, boa, y djaka.

Pa Aruba, e reintroduccion di e Lora ta necesario pasobra e ta beneficia ecosistemanan local y ta mehora biodiversidad. Ademas, e esfuersonan di reintroduccion ta ofrece un oportunidad excelente pa educa e comunidad riba e causanan di extincion y e importancia di conservacion di especie. Demostrando e regreso exitoso di parhanan cu antes tabata den captivo of naci den e condicionnan aki, ta un testimonio di e posibilidadnan di conservacion global di e Lora.

Pa FPNA e meta ta pa crea un poblacion salvahe di Lora cu por sostene su mes na Aruba, pa futuro generacionnan. Pa cu esey ta esencial pa mitiga e menasanan pa medio di un plan di reintroduccion, accionnan di conservacion, investigacion,

educacion y conscientisacion, envolvimento di comunidad y desaroyo di manehonan pa proteha e Lora.

Durante e ultimo año, e team di Conservacion di FPNA y su rangeman, cu apoyo di expertonan local, regional y internacional, a traha incansablemente pa completa exitosamente e stapnan necesario prome cu e reintroduccion di e Lora, mientras tambe ta intensifica esfuersonan pa cu conscientisacion y participacion di comunidad di Aruba. FPNA ta dedica pa establece un estructura di financiamiento duradero pa medio di iniciativanan di adopcion y sponsorship, pa sostene e programa aki.

Finalmente, pa e año 2043, FPNA ta aspira pa mira un poblacionnan prospero di e Lora den henter e isla di Aruba.

Fundacion Parke Nacional Aruba ta extende su gratitud na su partnernan local, regional y internacional pa nan apoyo den tur e esfuersonan pa cu e reintroduccion di e Lora. Ta tuma un comunidad completo pa reintroduci e Lora bek na Aruba.

Acompañando Prinses Beatrix tabata Minister di Naturalesa, Sr. Ursell Arends, ken tabatin e honor di presencia e Loranen prome cu nan liberacion cu ta plania pa tuma lugar dentro di poco.

Den preparacion pa e liberacion di e Loranen, FPNA lo inicia un campaña nacional di conscientisacion cu e meta pa stimula conocimiento tocante e importancia di parhanan di Aruba y finalmente transforma e comunidad di Aruba den cuidador di e parhanan aki hunto cu FPNA.